

LEI PLAÇATS

Sus l'èr de *Ara qu'avèm tot acabat*

En seguida dau biais viciat de foncionar de l'occitanisme, que se constata que tròp despuei "la professionalizacion" demandada a bòn drech per lei militants, lei qualei se veson privar d'ajudas per lei que li devon son pòste... Mai kafkaian, mòres !

Ara qu'an ben manifestat,
Ieu ai mon sèti, ieu ai mon sèti,
Ara qu'an ben manifestat,
Ieu ai mon sèti ben onchat.

Li anèron totei, li anèron totei,
Per aver de representants,
Li anèron totei, li anèron totei,
Paurei colhons de militants.

Ara que siáu tant ben plaçat,
Lèvi l'arbilha, lèvi l'arbilha,
Ara que siáu tant ben plaçat,
Lèvi l'arbilha ai qu'an susat.

Cresèron totei, cresèron totei,
A la professionalizacion,
Cresèron totei, cresèron totei,
Avèm forviat seis intencions.

Ara que siáu tant ben plaçat,
Rèsta ma filha, rèsta ma filha,
Ara que siáu tant ben plaçat,
Rèsta ma filha/mon fraire a casar.

O sauprai faire, o sauprai faire,
Qu'ai tant si ben tòc'manetat,

O sauprai faire, o sauprai faire,
E son sèti daurat l'aurà.

Ara que siáu tant ben plaçat,
E mai ma filha, e mai ma filha,
Ara que siáu tant ben plaçat,
Me rèsta encara mon filhat/conhat.

O sauprai faire, o sauprai faire,
Que onte fau siáu encartat,
O sauprai faire, o sauprai faire,
E eu tanben rosigarà.

Ara que tenon lo malhum,
Dançam la ronda, dançam la ronda,
Ara que tenon lo malhum,
Dançam la ronda dei cocuts.

Lèvan l'ajuda, lèvan l'ajuda,
Ais editors e ais autors,
Lèvan l'ajuda, lèvan l'ajuda,
A tot trabalh de prigondor.

Ara que son totei plaçats,
L'occitan crèba, l'occitan crèba,
Ara que son totei plaçats,
L'occitan crèba... mai son pagats !